

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HAZRAT MUHYI-UD-DIN AL-KHALIFATULLAH

Munir Ahmad Azim

09 Octobre 2015 ~
(25 Dhul-Hijjah 1436 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite commence so Khutba lors « **Khidmat-e-Khalq** »:

وَيُطْعِمُونَ الطَّعَامَ عَلَى حُبِّهِ مِسْكِينًا وَيَتِيمًا وَأَسِيرًا

إِنَّمَا نَطْعِمُكُمْ لَوَجْهِ اللَّهِ لَا نُرِيدُ مِنْكُمْ جَزَاءً وَلَا شُكْرًا

Wa yut-'imuunat-ta-'aama 'alaa hub-bihii miskiinaww-wa yatimaww-wa 'asiiraa. 'Innamaa nut-'imukum li-waj-hillaahi laa nuriidu minkum jaza 'aww-wa laa shukuuraa!

« Et zot ti donne à manger, pour l'amour d'Allah, à banes pauvres, banes orphelins et banes prisonniers, (en disant) : 'Nous donne ou manger, pour simplement trouve figure d'Allah. Nous pas cherche de ou aucaine récompense ni aucaine remerciement.' » (Al-Insaan 76: 9-10)

Après Ibaadat Allah, kitchose ki Quran fine mette plisse l'emphase c'est 'Khidmat Khalq' (Service à l'Humanité). En vérité, sa deux là, c'est-à-dire, Ibaadat Allah et Khidmat-e-Khalq - l'amour pour l'humanité (bane Insaan), c'est bane parties de la religion. Pense bien ki c'est pas deux sujets différents, mais zot deux branches d'ene même pié. Pli ou pour comprend signification de Ibaadat et pli ou pou faire Ibaadat Allah, automatiquement ou relation are bane humains aussi pou continuer augmenter. Sa deux branches là, zot développer ensam-ensam. Li pas possible ki branche de Ibaadat d'Allah développé et fleuri, tandis ki branche de relation avec bane humains alle sec et laisse place à bane piquants, etc.

Si zamais li coumsa, bé li ene preuve ki sa *Ibaadat* ki ou fine faire là, fine alle dans vide. Li veut dire ki ou pas fine comprend même vrai signification de *Ibaadat*. À ce moment là li ene déception si ou penser ki ou pé faire *Ibaadat* Allah. Parceki celui ki faire *Ibaadat* Allah, li péna aucaine autre chemin ki établi bane bons relations avec bane humains. Donc dans sa contexte là, *Ibaadat* aide ou beaucoup pou établir et raffermir bane relations avec bane humains. Et sa li ene façon pour reconnaître ene *Ibaadat* sincère. Au moins lors niveau humains ou capave reconnaître li. Parceki *Ibaadat* au niveau Allah, sa ou pas pou capave trouver. Mais lors niveau humains, facilement ou capave reconnaître bane *Ibaadat* sincères, et sa c'est à travers banes excellent qualités morales. Et banes traitement ki ou faire avec banes créatures d'Allah, avec banes pauvres, avec banes dans les besoins, li banes signes pour montrer ki autant même ou banes *Ibaadat* pé accepter de côté Allah.

Donc, dans sa contexte là mo fine choisir banes hadiths de Hazrat Muhammad (saw) ki ena connexion avec le sujet de relation mutuel entre banes humains, et aussi concernant l'enseignement de la moralité de banes excellent manières de banes humains. Ena beaucoup hadiths lors sa sujet là, mais pas pou capave alle lors tous. Parceki l'établissement de ou banes morales li commence dans ou propre la caze et puis li commence ena l'effet lors banes voisins, li continuer sorti en dehors et li répanne aller même. Stage par stage voyage là commencer avec ou banes proches et grandi aller même jusqu'à bane étrangers. À ene tel point ki en résultat de sa voyage là, ou gagne ene nouveau connaissance de *Insaaniyat* (humanité) et ou goût de bane relations augmenter ziska ki banes ki, hier, ti bane *Ghayr* (non-croyants), maintenant ou senti zot comme bane proches. Si suite à ou connexion avec Allah, malgré sa, ou bane cercles de relation avec banes humains pas augmenter ; si au contraire banes là tourne le dos avec ou à cause de ou relation solide avec Allah, et si zis quelques-uns seulement comprend sa connexion ki ou ena avec Allah là et zot aussi envie raffermi zot relation avec Allah couma ou, bé à ce moment là, sa bane là c'est ou bane vrais familles, ki forme partie de ou même, de ou propre la caze.

Alors tout sa dépanne de ki kalité dimounes ki forme partie de sa bane relation ki augmenter, aller même. Ena bane *Ghayr* ki malgré tous façons ki ou servi avec zot, zot pas reformer même et zot pas vine pour ou, tandis ki ena bane les autres parmi bane non-croyants même, ki au fond de zot même ena sa la grain de *Insaaniyat* là, alors Allah ensuite faire sa fleurir kot enfin le voile de l'ignorance tombé et zot pas garde aucaine rancune envers zot prochain, et zot accepter bane commandements d'Allah arrive saki arrive. Alors sa bane kalité dimounes ki deboute à ou côté, ki li dans bon et mauvais moment, ki arrive saki arrive pas casse zot relations avec ou par crainte ki zot casse relation avec Allah, alors sa bane là pou vine pour ou (bane Messagers d'Allah et bane croyants) et pour Allah aussi. Bane ki ou considère pour ou là, zot reste pour ou même et dans n'importe ki situation, ou faire ou le devoir pour faire zot l'intérêt primer lors banes les autres dimounes.

Moi, voyage vers laquelle mo pé appelle ou, c'est ene voyage ki Hazrat Muhammad (saw) ti adopter toute longue so la vie et li ti pé invite tout banes dimounes vers sa. Sa c'est tout à fait ene lotte sujet, li bien différent de banes relation normale ki existé entre banes humains. Quand ou redresse ou relation are banes dimounes de ou la caze, bé en fait li ene redressement pareil couma le Sunnah (pratique/ l'exemple) du prophète (saw).

Et à ce moment là li pas arrête là-bas même, kot ensuite ena redressement de relation avec banes voisins et en allant pli devant kot ena redressement avec banes dimounes de la région, de la ville, du pays, à tel point ki li continuer répanne et dépasse tout banes limites. Li prend ene tournure internationale. Et lerrà ou trouve le monde entier, comme ene partie de ou propre famille. Et c'est en résultat de sa même, ki vrai la justice prend naissance. C'est pourquoi le Quran fine pousse sa sujet là devant jusqu'à ki li fine faire arrive à « *Ittaé zil Qurba* ». Sa pas veut dire ki avec lotte dimoune ene qualité traitement et ou bane proches ene lotte qualités traitement, Non. « *Zil Qurba* » : veut dire ki, relation de sak *Momeen* (croyants) avec bane les autres commencer avec la justice et li rentre dans *Ehsaan* (faveurs/bonté) et après avoir couvert tout bane stages de *Ehsaan*, li rentre dans limite de « *Zil Qurba* ». Là-bas ou trouve zot tous couma dire ou banes proches même. Pour faire bien comprend sa sujet là, Hazrat Muhammad (saw) fine prend banes dimounes comme banes descendants d'Allah.

Descendants veut dire famille. De la même façon « *Zil Qurba* » englobe tout. Si tout banes créatures zot de descendants d'Allah, bé à ce moment là ou relation avec banes les autres dimounes pou couma dire relation avec ou propre familles. Sa même sujet ki mo pé explique le Jamaat en référence avec l'exemple de Hazrat Muhammad (saw); li ena profonde connexion avec la grande révolution spirituelle universel. Sans sa, ou pas pou digne pour faire sa travail là.

Mais kan mo guette un peu la situation de banes la cazes musulmans, banes Ahmadis, et même certain la caze dans le Jamaat Ul Sahih Al Islam de certain pays, bé mo lé cœur trembler, ler mo constate situation de certains banes la caze, surtout dans le Jamaat Ul Sahih Al Islam, kot mo alle constater ki dans certain places pas encore même commence sa voyage là !

Mo bane disciples bizin bien garde sa à l'esprit, ki accepter la Manifestation Divine et reconnaite le Khalifatullah de sa siècle là pas veut dire ki ou fine vine d'hors et déjà vine ene vrai Musulman (ene vrai *Momin*, ene *Sahih al Islam*). Non. Au contraire, c'est maintenant ki ou fine rentre dans sa véhicule là pou fer sa voyage là. Ene voyage ki pou bien bien difficile pou ou, mais ki si ou réussi sa voyage là, bé Allah même pou bien content avec ou. Tous bane ki rentre dans le Jamaat et ki dire ki zot croire, oui, *Alhamdulillah*, ça c'est ene premier pas, mais Allah pou tester zot avec sa affirmation de croyance ki ou dire ou ena là dans Allah et So Khalifatullah et la Manifestation Divine, le Jamaat Ul Sahih Al Islam. Ou appartenance à Jamaat Ul Sahih Al Islam, li couma dire ou fine rentre dans sa véhicule ki pou permette ou fer sa voyage là, sa reforme interne et externe de ou propre être là, afin pou consolide ou liens avec bane dimounes et de ce fait, avec Allah

aussi. Si ou bypass bane dimounes, ou pas fer bane zefforts requise pou consolide le lien de fraternité, de *Insaaniyat*, bé ou pou fail dans sa voyage ki ou fine entreprendre là. C'est en fait maintenant ki ou fine rentre dans le bain afin pou purifier ou. Sa pas veut dire ki couma ou rentre dans le Jamaat d'Allah ou fine fini gagne visa du Paradis, ou fine fini vine expert couma pou fer la réforme de bane les autres. Non. Au contraire, c'est ou propre réforme ki pé commencer. Sa voyage là, si ou réussi fer li et ki sa profite ou l'intérieur, ou l'âme et ou moralité aussi, alors sa pou ena ene bon répercussion aussi dans ou l'entourage, kot *Insha-Allah*, avec persévérance, patience et confiance dans Allah, Allah même pou fer bane voiles de l'ignorance tomber de bane lizié de bane dimounes et fer zot reconnaite ki ou la vérité et ki ou dans la vérité. Mais faudé ki avant sa, ou réussi dans sa l'entraînement (sa training) ki ou fine fer l'intention pou fer kan ou fine reconnaite ene Messenger d'Allah, et ki ou fine prend *Baiat* (serment d'allégeance, d'obéissance) dans so la main. C'est astère ki ou pou alle fer sa voyage là et c'est Allah ki pou fer conné kan ou fine réussi dans sa l'entraînement spirituelle ki ou fine (ou pou) entreprendre là.

Donc, couma mo ti pé dire, ena beaucoup banes la caze kot banes relation bien, bien vilains et déplorable. Li pas bon di tout, bien loin avec l'enseignement l'Islam, et surtout dans nous l'époque en présence d'ene Khalifatullah kot dans certain la caze bane papa pas pé accompli droit de banes zenfants. Kot madames pas pé accompli droit zot mari, kot pé lève la voix pli haute ki mari, mari cause ene, zot cause dix et aussi kot bane maris aussi pas pé accompli droit de zot banes femmes. Ena la caze, zenfants pas pé accompli droit de zot parents. Dans la vie de tous les jours, sa tiguette manière là, aussi zot péna, couma pou causer are zot banes parents, couma pour adresse banes parents. Ena zenfants adresse zot parent : « *Eh !* ». Pas même dire papa, ou maman, couma dire zot pé cause avec zot camarade même. Donc, ou bizin ena ene manière adressé et causer. Mo péna le mot exacte couma zot adresse zot parents. Zot victime de l'arrogance, et objections et mauvaises manière etc. Lerlà ene tel parent so la caze vine ene l'exemple de l'enfer. Et pli devant banes zenfants là zot sitan loin de bane valeurs islamiques et de bane bonnes manières et façon de vivre ki ler ou réfléchi lors zot situation, ou étonner. Au contraire, « étonner » li ene mot trop faible pou dire ; mo servi « étonner » à cause mo péna les mots pou qualifier zot banes actions. Donc pou sa banes qualité la caze là, la révolution spirituelle pas pou ena aucaine l'effet et péna aucaine spiritualité ki pé manifester dans sa qualité la caze là et nom de dire zot ene musulman, ou zot appartenir dans Jamaat Ul Sahih Al Islam, zot couma banes branches sec.

Jamaat Ul Sahih Al Islam c'est ene Jamaat d'Allah sa. C'est Allah (swt) ki fine élève sa humble serviteur ki devant zot là, avec ene Jamaat, ki li **Sahih al Islam**. Donc c'est ene Jamaat ki Allah (swt) fine donne moi et li pé pousser, mo capave dire ene pié ki rempli de verdure, mais couma fine passé dans l'histoire de tous bane prophètes et messagers d'Allah, bane quelques branches ki fine sec, sa c'est en fait banes branches ki pou couper de moi. Ou content, ou pas content sa pié là pou certainement pousser, li pou grandi et so banes branches pou alle dans différent

direction bien, bien loin et li pou fleurir. Sa fine destiner ki so branches pou répanne *Insha-Allah* dans le monde entier et banes z'oiseaux spirituelle pou faire zot nid dans sa banes branches là, et zot pou trouve zot tranquillités là-dans et zot pou prend plaisirs avec so banes fleurs et so banes fruits. Ensemble avec sa, définitivement ena banes branches ki fine sec et ki pou sec, et alors zot pas pou capave reste lors sa pié là. Allah (swt) pou coupe zot de moi et zot situation pou bien grave devant Allah (swt). Facile pou ou comprend ki mo pé rode dire, banes dibois sec péna aucaine autre destination ki di feu, donc kan mo guette dans sa banes l'angles là, vraiment mo le cœur trembler.

Par la grâce d'Allah dans le Jamaat Ul Sahih Al Islam la grande majorité de mo banes disciples, zot bien loin avec sa banes mauvaises manière là. Mais ene ti quantité ki pé rentre dans le Jamaat, ki pé amène sa banes mauvais manière la, malgré beaucoup de *Tarbiyyat* et banes conseils et sa pas pé changer di tout. Mo pas oulé ki nous vine pareil couma sa bane les zot Jamaat là. Sinon pas pou ena aucaine différence entre nous et zot. Alors nous bizin faire beaucoup *duah* pou zot ki zot pas vine sa bane kalité branches sec là. Bizin faire boucou zéffort et *duah* ki le Jamaat d'Allah pas ena sa bane mauvais l'odeur là et aussi nous bane l'ennemie pas saisie sa bane ti l'odeur là pou blâme le Jamaat en entier. **Donc zot aussi zot digne de nous bane sympathie.** Couma eski nous capave dire, laisse zot bruler couma di bois sec bruler dans difé. Si sa ti ene bon réaction, si Hazrat Muhammad (saw) aussi ti ena sa même tendance là, bé azordi le monde entier ti pou brûler nette. Au contraire Nabi Kareem (saw) ti pé chagrin pou sakaine de sa bane kalité dimoune/ branche sec là. So le cœur ti souple pour tout dimounes. Pou chaque dimoune so *Rahmat* fine tomber couma la pluie. Et kot li fine aller li fine teigne tout sa bane di feu d'amertume là. C'est grâce à so bénéfice même ki le Jamaat Ul Sahih Al Islam pé émerger par la grâce d'Allah. Et c'est so la pluie de *Rahmat* et *duah* même ki pé tomber lors Jamaat Ul Sahih Al Islam et pé lave nous et purifier nous.

Donc dans sa contexte là li très nécessaire pou porte attention à reforme de sa bane dimounes là. Faudré pas nous rejette zot, ou bien nous mette zot apart. Non! Sa c'est pas nous but principale, nous but céki nous sape les zot, nous pas vine égoïsme de céki nous fine gagner ; au contraire, nous fer le tout pour le tout pou nous risse zot avec nous, et nous vivre couma ene seul famille ki bien proche avec la paix, l'harmonie et tranquillités avec zot, *Insha-Allah. Ameen.* Si arriver zot pas reformer même du tout même, alors c'est Allah même ki pou coupe zot et pou empêche zot fer l'arbre d'Allah du tort dans kit façon.

Ki Allah gagne pitié de tous mo bane disciples et de tous mo bane frères et sœurs musulmans et l'humanité en entier et ki nous tout main dans la main, avec ene franchise dans lé cœur pou deboute pour la cause d'Allah, pour Li tout touseul et non pas par égoïsme ou pou montrer lizié dimounes, nous deboute pou fer la reforme de nous même, et aussi nous la caze, nous famille biologique et spirituelle aussi. *Insha-Allah, Ameen.*